

**Wednesday, June 24, 2026**

**Time - 2:30pm - 2:35pm**

**AKASHVANI AIZAWL**

**REGIONAL NEWS UNIT**

**CM**

Chief Minister Pu Lalduhoma chuan Mizoram-in dan leh hrai thlahdulna hmanga dan siamthatna kalpuiin Zoram mipuite tan sumdawnna kawng ti awlsam turin hma lak a nih thu a sawi.

Wawiin khan Chief Minister Pu Lalduhoma chuan CMO-ah chanchinbumite kawmin, Mizoram Sawrkarin sumdawnna kawng hrang hrang tihawlsamna tura hmalakna 'Compliance Reduction & Deregulation Reforms Programme' kalpui mek chungchang a hrilhfhah a. Chief Minister chuan he hmalakna hi Mizoram economy thang chho zel tur leh mipuite tana hna siambelhna kawnga lungthu pawimawh tak a nih tur thu a sawi ani.

Mizoram Sawrkar chuan sawrkar laipui hmalakna zinga pakhat, Compliance Reduction and Deregulation Reforms Programme hnuaia dan leh hrai tlo lo leh rit lutukte tihltlem a, kalphung tihawlsam te, inrintawnna thupuia hman chung a rorelna kalpui te, leh sumdawnna lama hmasawnna leh investment, entrepreneurship leh ei leh bara than theihna tura environment tha siam tumna chu nasa takin a kalpui mek tih a sawi.

Commerce & Industries department chu Nodal Department niin, anni hian Mizoram sawrkar hnuaia department leh agency hrang hrangte he hmalaknain a huamte enzuiin an kaihruai dawn a ni.



**PHED OFFICERS CAPACITY BUILDING**

Wawiin khan PHE department Officer-te tana ni hnih awh tur intuaitharna leh thu zirhona, Capacity Building Program chu PHE Conference Hall, E-in-C pisa, Khatlaah hawn a ni.

Capacity Building Program hi Bureau of Indian Standards (BIS) Guwahati Branch Office leh Food, Civil Supplies & Consumer Affairs (FCS&CA) Department te buatsaih a ni a. Mizoram PHE department hnuaia Senior Executive Engineer leh a chunglam te tana ruahman niin, he program-ah hian mi 20 vel an tel thei a. Thupui pawimawh thlan bik 12 atangin BIS lama mithiam pahnih – Dr. Anuj Verma (Assistant Professor, RIMT) leh Dr. Murali Mohan (Senior Environmental Scientist, TSPC) ten zirtirna an pe dawn a ni.

He hun hi Chief Secretary Chairman-na hnuaia Committee pawimawh tak pakhat – ‘State Level Standardisation Committee’ thutkhawm hnukung ber a committee thuchhuak bawhzuina kal zel a ni a. BIS Guwahati mi leh sa te chuan Capacity Building Program chu Mizoram Sawrkar Department thlanchhuah bik te hnenah a tahtawla huaihawt zel tum a nih thu sawiin, Thawhtanni khan PWD Officer-te tan Capacity Building Program hi an lo buatsaih tawh bawk a ni.



**PMMVY**

Directorate of Women & Child Development chuan nu naupai te tana hamthatna dawn theihna scheme Pradhan Mantri Matru Vandana Yojana (PMMVY) a inzhiah luhna hun chu June 15 atanga July 15, 2026 thleng a hawng mek.

Women & Child Development department chuan nu naupai lai zawng zawng te chu Anganwadi Centre hnai ber a lo inziak lut ve theuh turin an sawm a. PMMVY Scheme hnuaiah hian fa hmasa ber atan nu in cheng 5,000 dawn theih niin, fa pahnihna hmeichhia nei te tan cheng 6,000 nu hnenah Direct Benefit Transfer hmangin an bank account ah thunsak thin an ni a. PMMVY hnuaia hamthatna dawng tur hian nu te adhaar card leh passbook a ngai a, heng documents pahnih ah hian nu hming hi a inang tur a ni a, an adhaar card hi an phone number leh an passbook nen a in thlunzawm a ngai bawk a ni.

He scheme hnuaiah hian Directorate of Women and Child Development hian Kum 2025 – 2026 chhung in mi 5,841 hnenah hamthatna hi an lo pe tawh a, a sum fai chuan cheng nuai 279 sing 6 sang 8 pek chhuah tawh a ni.



**HOLISTIC PROGRESS CARD TRAINING**

MBSE leh NCERT tangkawpin Master Trainers’ Training on Holistic Progress Card (HPC) at Secondary Stage training buatsaih a ni.

Mizoram Board of School Education (MBSE) leh Performance Assessment, Review, and Analysis of Knowledge for Holistic Development (PARAKH), NCERT, New Delhi te hmalaknain Thawhtanni leh nimin khan, MBSE Office, Chaltlangah ni hnih awh Master Trainers’ Training on Holistic Progress Card (HPC) at Secondary Stage hi buatsaih a ni a.

Training-ah hian Resource Person atan PARAKH, NCERT atanga lo kal hman a ni a, a hnen atang hian PARAKH hmalakna hrang hrang leh he training pawimawhna te ngaihthlak a ni a. A hawwna programme zawhah hian Resource Person kaihhruaina hnuaiah technical training session chhunzawm nghal a ni a. HPC secondary stage-a hriat tur pawimawh hrang hrangte inzirtirna leh practical training te neih a ni. He training-ah hian MBSE Officer-te, District Institute of Education and Training (DIETs) leh Institute of Advanced Studies in Education (IASE)-a zirtirtute chu Master Trainer ni turin training pek an ni.

He training programme hi MBSE in tun academic session a HPC pilot tih tanna atana inbuatsaihna a ni a, MBSE chuan an Affiliated sikul sawm (10)-ah HPC hi enchhinna (pilot implementation) kalpui turin inbuatsaihna a kalpui mek a ni.

